



МОНГОЛ УЛС ШАДАР САЙДЫН ТУШААЛ

20 20 оны 11 дугаар
сарын 25 -ны өдөр

Дугаар 146

Улаанбаатар
хот

Түр журам батлах тухай

Монгол Улсын Засгийн газрын тухай хуулийн 24 дүгээр зүйлийн 2, Гамшгаас хамгаалах тухай хуулийн 22 дугаар зүйлийн 22.1, 23 дугаар зүйлийн 23.1, 28 дугаар зүйлийн 28.1.1, 28.1.5, Коронавируст халдварын цар тахлаас урьдчилан сэргийлэх, тэмцэх, нийгэм эдийн засагт үзүүлэх сөрөг нөлөөллийг бууруулах тухай хуулийн 11 дүгээр зүйлийн 11.1, 11.2, 11.3, 11.4, Эрүүл мэндийн тухай хуулийн 13 дугаар зүйлийн 13.7, 20 дугаар зүйлийн 20.1.6, 43 дугаар зүйлийн 43.2.3, 44 дүгээр зүйлийн 44.1.5, Автотээврийн тухай хуулийн 14 дүгээр зүйлийн 14.1, Монгол Улсын Засгийн газрын 2015 оны 416, 2020 оны 178, 181 дүгээр тогтоолыг тус тус үндэслэн ТУШААХ нь:

1. Гамшгаас хамгаалах бүх нийтийн бэлэн байдлын зэрэгт шилжүүлэн хөл хорио тогтоосны улмаас өөр орон нутагт саатсан иргэд тухайн орон нутаг руугаа буцахтай холбогдсон харилцааг зохицуулах, зохион байгуулалтын арга хэмжээ авах зорилго бүхий "Зорчигч тээврийн үйлчилгээг зохион байгуулах түр журам"-ыг хавсралтаар баталсугай.

2. Түр журмын хэрэгжилтийг ханган, зохион байгуулалтын арга хэмжээ авч, нэгдсэн удирдлагаар хангаж ажиллахыг Зам, тээврийн хөгжлийн сайд /Л.Халтар/, дэмжлэг үзүүлэн хамтран ажиллахыг Эрүүл мэндийн сайд /Т.Мөнхсайхан/, Цагдаагийн ерөнхий газар /Ж.Болд/, Мэргэжлийн хяналтын ерөнхий газар /Т.Гантулга/, аймаг, нийслэлийн Онцгой комиссын дарга нарт тус тус даалгасугай.

3. Түр журмын хэрэгжилтэд хяналт тавьж ажиллахыг Онцгой байдлын ерөнхий газрын дарга, бригадын генерал /Г.Ариунбуян/, Монгол Улсын Шадар сайдын зөвлөх /О.Машбат/ нарт тус тус үүрэг болгосугай.

Монгол Улсын Шадар сайд



Я.СОДБААТАР

2010586

ЗОРЧИГЧ ТЭЭВРИЙН ҮЙЛЧИЛГЭЭГ ЗОХИОН БАЙГУУЛАХ ТҮР ЖУРАМ

Нэг. Нийтлэг үндэслэл

1.1. Энэхүү түр журмын зорилго нь Коронавируст халдвар (КОВИД-19)-ын цар тахлын тархалттай тэмцэх хариу арга хэмжээг эрчимжүүлэх, эрсдэлээс урьдчилан сэргийлэх зорилгоор Гамшгаас хамгаалах бүх нийтийн бэлэн байдлын зэрэгт шилжүүлсэнтэй холбогдуулан зорчигч тээврийн үйлчилгээг зохицуулах, зохион байгуулахтай холбогдсон харилцааг зохицуулахад оршино.

1.2. Зорчигч тээврийн тусгай үүргийн үйлчилгээ үзүүлэхэд Монгол Улсын хууль тогтоомж, Олон Улсын Эрүүл мэндийн дүрэм (ОУЭМД 2005), Улсын Онцгой комисс, мэргэжлийн байгууллагаас гаргасан болон тээвэрлэлтийн үйл ажиллагаанд мөрддөг нийтлэг дүрэм, журам, заавар, зөвлөмжийг мөрдлөг болгон ажиллана.

1.3. Энэхүү түр журам нь байнга оршин суудаг нутаг дэвсгэрийн хаягаасаа өөр газарт хөл хорионы улмаас саатсан иргэд тухайн орон нутаг руугаа буцахад нэг удаа үйлчилнэ.

1.4. Түр журам нь тээврийн хэрэгслээр төв, суурин газраас бусад төв, суурин газар руу зорчих зорчигч тээврийн үйлчилгээнд хамаарна.

1.5. Түр журам нь Гамшгаас хамгаалах бүх нийтийн бэлэн байдлын зэрэгт шилжүүлсэн хугацаанд Монгол Улсын нутаг дэвсгэрт үйлчлэх бөгөөд бүх шатны төрийн байгууллага, гамшгаас хамгаалах улсын албад, аж ахуйн нэгж, байгууллага, иргэд дагаж мөрдөнө.

1.6. Энэхүү түр журмаар зохицуулаагүй бусад харилцааг холбогдох хууль тогтоомж, тогтоол, шийдвэр, дүрэм, журмаар зохицуулна.

Хоёр. Зорчигч тээврийг зохион байгуулах

2.1. Төв, суурин газраас бусад төв, суурин газар руу зорчих шаардлагатай иргэдийг нийтийн, хувийн болон албаны тээврийн хэрэгслээр тус тус зорчуулна.

2.2. Зорчих хүсэлтэй иргэн нь www.119.mn хаягаар нэвтэрч аймаг, нийслэлд зорчих шаардлага, иргэний бүртгэл, эрүүл мэндийн болон бусад мэдээллээ үнэн зөв бөглөж, хүсэлтээ цахим хэлбэрээр гаргана.

2.3. Хүсэлт гаргагч нь www.119.mn хаягаар нэвтэрч өөрийн хүсэлтийг шалгах бөгөөд Улсын Онцгой комиссын Шуурхай штабаас гаргасан хуваарьт заасан оношлогооны төвд зорчих хугацаанаас 48 цагийн өмнө КОВИД-19 вирусийн шинжилгээ өгнө.

2.4. Түр журмын 2.2, 2.3-т заасан шаардлагыг хангасан иргэн зорчих эрхтэй болох бөгөөд Улсын Онцгой комиссын Шуурхай штабаас гаргасан хуваарийн дагуу нийтийн тээврийн хэрэгслийн зорчих тийзийг холбогдох байгууллагын тасалбар түгээх төв рүү цахимаар холбогдон, төлбөрийг төлсөнөөр тийз цахимаар олгогдож, зорчих өдөр, цаг тодорхой болно.

2.5. Түр журмын 2.2, 2.3-т заасан шаардлагыг хангасан хувийн болон албаны тээврийн хэрэгслээр зорчих иргэд www.119.mn хаягаар орж өөрийн шинжилгээний хариутай хамт ирсэн QR кодыг хэвлэж, өөрийн бичиг баримтын хамт авч явах бөгөөд замын шалган нэвтрүүлэх постуудад тухай бүр шалгуулна.

2.6. Их, дээд сургууль, политехник коллеж, мэргэжил сургалт үйлдвэрлэлийн төвийн дотуур байрны оюутнууд түр журмын 2.2-т заасан www.119.mn хаягаар нэвтэрч бүртгүүлсний дараа Улсын Онцгой комиссын Шуурхай штабаас гаргасан хуваарийн дагуу шинжилгээний тусгай баг оюутны байр тус бүрт очиж шинжилгээ авна.

2.7. Их, дээд сургууль, политехник коллеж, мэргэжил сургалт үйлдвэрлэлийн төвийн гадуур байрладаг оюутнууд www.119.mn хаягаар орж түр журмын 2.2, 2.3-т заасны дагуу шинжилгээ өгсөнөөр зорчих эрхтэй болно.

2.8. Аймаг, нийслэл, сум орон нутагт сургалт, хурал, зөвлөгөөнд хамрагдах болон албан ажлаар ажиллаж байгаад хөл хорионы улмаас саатсан төрийн албан хаагчдыг түр журмын 2.2, 2.3-т заасны дагуу шинжилгээнд хамруулсаны үндсэн дээр тухайн орон нутагт нь буцаан зорчуулах арга хэмжээг Улсын Онцгой комиссын Шуурхай штабаас гаргасан хуваарийн дагуу холбогдох байгууллагууд зохион байгуулна.

2.9. Түр журмын 2.2, 2.3-т заасан шаардлага хангаагүй болон КОВИД-19 вирусийн шинжилгээний хариу эерэг болон сэжигтэй гарсан иргэнийг бусад төв, суурин газар руу зорчуулахгүй.

Гурав. Зорчигч тээврийн хуваарь, тоо бүртгэл

3.1. Иргэд, оюутнуудыг тухайн орон нутагт нь буцаах хугацаа, хуваарийг болон түр журмын 2.3, 2.4, 2.5, 2.6, 2.8-д заасан хуваариудыг холбогдох байгууллагуудтай хамтран Улсын Онцгой комиссын Шуурхай штаб гаргана.

3.2. Агаарын хөлөг, зорчигчийн вагон, автобусаар зорчих зорчигчдын халдвар хамгааллын дэглэм, хоорондын зай, тэмдэг тэмдэглээ зэргийг Эрүүл мэндийн яамнаас тогтоосон дэглэмийн дагуу тухайн зорчигч тээврийн хэрэгслийг хариуцах байгууллага байршуулна.

3.3. Түр журмын 2.6, 2.7-д заасан их, дээд сургууль, политехник коллеж, мэргэжил сургалт үйлдвэрлэлийн төвийн дотуур байр болон гадуур байрладаг оюутнуудыг орон нутагт зорчуулах арга хэмжээг Боловсрол, шинжлэх ухааны яам, Хөдөлмөр, нийгмийн хамгааллын яам болон тухайн сургуулийн захиргаа холбогдох байгууллагуудтай хамтарч зохион байгуулна.

3.4. Нийтийн, хувийн болон албаны тээврийн хэрэгслээр зорчих нийт зорчигчдийн нэгдсэн тоо, бүртгэлийг гаргах, хөдөлгөөнийг хянах, шаардагдах тээврийн хэрэгслийн бэлэн байдал, аюулгүй ажиллагааг хангах, хэрэгжүүлэхтэй холбогдсон бүхий л арга хэмжээг Зам, тээврийн хөгжлийн яам, Цагдаагийн ерөнхий газар, Аймаг, нийслэлийн Онцгой комисс, холбогдох байгууллагууд хамтран зохион байгуулна.

Дөрөв. Зорчигчид тавигдах шаардлага

4.1. Нийтийн тээврээр буюу зохион байгуулалттай зорчиж байгаа зорчигч нь амны хаалт, бээлий, спиртэн суурьтай гар халдваргүйжүүлэгч уусмал, хувийн хэрэгцээний зүйлс, замд хэрэглэх хоол, хүнс, хогийн уутыг бэлтгэнэ.

4.2. Зорчигч нь тээвэрлэлтийн туршид халдвар хамгааллын дэглэмийг баримталж (хооллохоос бусад нөхцөлд амны хаалтыг авахгүй байх, бээлий өмсөх, нэг удаагийн амны хаалтыг 2 цаг тутам солих, бээлийг тайлсан тохиолдолд гарыг халдваргүйжүүлэх, бусадтай биеэр хүрэлцэхгүй байх, ойролцоох суудлын зорчигчтой болон олноор нэг дор бөөгнөрч ярихгүй байх), мэргэжлийн байгууллага болон жолоочийн тавьсан шаардлагыг биелүүлнэ.

4.3. Зорчигч нь тээврийн хэрэгслээр зорчихдоо тээвэрлэлтийн туршид иргэний үнэмлэх, цахим зорчих тасалбарыг өөрийн биед авч явах бөгөөд зөвхөн заасан суудалд сууна.

4.4. Зорчигч нь тээврийн хэрэгсэл дотор болон цонхоор ил задгай нус, цэр, шүлс хаяхгүй, хог хаягдлыг өөрийн бэлтгэсэн хогны уутанд битүүмжилж, эцсийн зогсоол дээр ирмэгц хогийн цэгт хаяна.

4.5. Тухайн орон нутагтаа очмогц 14 хоногийн хугацаанд өөрийгөө гэртээ тусгаарлан, өөрийн болон бусдын эрүүл мэндийг хамгаалж, халдвар хамгааллын дэглэмийг мөрдөх бөгөөд халдварын шинж тэмдэг илэрвэл тухайн аймаг, нийслэлийн Онцгой комисс, Эрүүл мэндийн байгууллагад нэн даруй мэдэгдэнэ.

Тав. Тээвэрлэгчид тавигдах шаардлага, хүлээх үүрэг

5.1. Тээвэрлэгч аж ахуйн нэгж, байгууллага дараах шаардлагыг хангах үүрэгтэй.

5.1.1. тээвэрлэгч нь халдвар хамгааллын дэглэм, нөхцөлөөс шалтгаалж, тээвэрлэлтийн үнэ хөлсийг урьдчилан тодорхойлж, зохих зөвшөөрлийг авна;

5.1.2. аюулгүй зорчих нөхцөл, тээвэрлэлтийн аюулгүй байдлыг хангаж үйлчилгээг стандартын шаардлагад нийцсэн зориулалтын тээврийн хэрэгслээр үйлчилнэ;

5.1.3. тээвэрлэлтийн гэрээгээр тогтоосон чиглэл, үйлчилгээний цагийн хуваарийн дагуу тээвэрлэлтийг гүйцэтгэнэ;

5.1.4. тээврийн багийн бүрэлдэхүүнд энэ журам болон онцгой нөхцөл байдлын үед ажиллах заавар, зөвлөмжийг танилцуулсан байна;

5.1.5. тээвэрлэлтийн аюулгүй байдлыг хангах үүднээс тээврийн багийн аюулгүй байдал, амны хаалт, бээлий, яаралтай тусламжийн хайрцаг, гар халдваргүйжүүлэх бодис, цэвэрлэгээний цомог, хогны уут зэргээр хангана;

5.1.6. нийтийн тээврийн автобусны эхний эгнээг чөлөөлж, тусгаарлах хаалт (тунгалаг зузаан уут)-аар зорчигчдоос тусгаарлаж, ээлжийн жолоочийн амрах хэсгийг гаргана;

5.1.7. тээврийн хэрэгсэлд хөшигнөөс бусад суудлын бүрээс, гоёлын унжуурга, зэргийг хориглож, гадаргууг халдваргүйжүүлэх орчинг бүрдүүлнэ;

5.1.8. тээврийн хэрэгсэлд зорчигчийг суулгах суудлын зохицуулалт хийж, тэмдэглэгээ хийсэн байна;

5.1.9. зорчигч бөөлжих, биологийн шингэн, цус, цэр, өтгөн ялгадсаар тээврийн хэрэгсэл бохирлогдсон үед цэвэрлэгээний цомгийг хэрэглэх бөгөөд халдваргүйжүүлэх уусмалыг цацаж, нэг удаагийн сальфетка, ариун цэврийн цаасыг ашиглан цэвэрлэгээг хийж хогны уутанд битүүмжилэн халдвар хамгааллын дэглэмийг мөрдөж ажиллах зааварчилгаа өгнө;

5.1.10. Тээвэрлэгч нь зорчигчийг бүрэн буулгасны дараа тээврийн хэрэгсэлд халдваргүйжүүлэлтийг мэргэжлийн байгууллагаар бүрэн гүйцэтгүүлнэ.

5.1.11. Зорчигч тээвэрлэлт гүйцэтгэж байсан тээврийн хэрэгсэл эвдэрч, цаашид тээвэрлэлтийг үргэлжлүүлэх боломжгүй болсон тохиолдолд "Автотээврийн үндэсний төв" Төрийн өмчит үйлдвэрийн газар нь тухайн орон нутгийн Онцгой комисстой хамтран аль ойр байрлах төв, суурин газраас хот хоорондын зорчигч тээвэрлэлтийн үйлчилгээ эрхэлдэг аж ахуйн нэгжийн тээврийн хэрэгслээр тээвэрлэлтийг үргэлжлүүлэх зохион байгуулалын арга хэмжээг авна. Эвдэрсэн тээврийн хэрэгслийн оронд үйлчлэх тээвэрлэгч нь түр журмын 5.1-д заасныг мөрдөж ажиллана.

5.2. Тээврийн багийн бүрэлдэхүүн дараах шаардлагыг хангах үүрэгтэй:

5.2.1. тээвэрлэлтэд гарах хугацаанаас 48 цагийн дотор КОВИД-19 вирусийн шинжилгээ авах цэгүүдэд шинжилгээ өгч, өөрийн шинжилгээний хариуг www.119.mn хаягаар орж шалгана;

5.2.2. хувийн хэрэглээний амны хаалт, бээлий, спиртэн суурьтай гар халдваргүйжүүлэгч уусмал, хүнс, бусад хувийн хэрэгцээний зүйлс, хогийн уутыг урьдчилан бэлтгэнэ;

5.2.3. өөрийн болон зорчигчийн аюулгүй байдлыг хангаж, халдвар хамгааллын дэглэмийг мөрдөж, зорчигчийн тоог халдвар хамгааллын дэглэмийн дагуу тогтоосон тооноос хэтрүүлэхгүй. Тээвэрлэлтийн туршид тээврийн хэрэгслийн агаар сэлгэлтийг анхаарч, агааржуулалтын төхөөрөмжийг тогтмол ажиллуулна;

5.2.4. зорчих тасалбар аваагүй, тухайн чиглэлд зорчих эрхгүй иргэнийг тээвэрлэх, зөвшөөрөгдөөгүй чиглэлд зорчих, зогсохыг зөвшөөрснөөс бусад газарт зогсож, зорчигчийг буулгах, нэмж зорчигч суулгахыг хориглоно;

5.2.5. мэргэжлийн хяналтын байгууллагын холбогдох чиглэлийн улсын байцаагч, бусад төрийн байгууллага, эрх бүхий байгууллагын албан тушаалтны тавьсан шаардлагыг биелүүлж, халдваргүйжүүлэлт хийх ажилтны зөвлөмж, зааврыг мөрдөнө;

5.2.6. тээвэрлэлтийн явцад заавар чиглэл, хуваарийн дагуу зорчигчдыг өөрсдийн бэлтгэсэн хоол, хүнсийг идэх боломжийг бүрдүүлнэ;

5.2.7. тээвэрлэлтийн явцад коронавируст халдварын шинж тэмдэг бүхий зорчигч илэрвэл тухайн аймаг, нийслэлийн Онцгой комиссын шуурхай штабт мэдэгдэж, төв суурин газарт нэвтрэхгүй, тандалт, судалгааны багийг иртэл зорчигчдийг тээврийн хэрэгсэлд түр байлгана;

5.2.8. тээвэрлэлтийн явцад иргэдийн хэрэглэсэн амны хаалт, бээлий, ахуйн гаралтай хог хаягдлыг тухайн тээврийн хэрэгслийн жолооч цуглуулж нийслэл, орон нутгийн тогтоосон цэгт битүүмжлэн хаяна. Ил задгай болон бусад цэгт хаяхыг хатуу хориглоно;

5.2.9. хогийг цуглуулж хаяхдаа хувийн хамгаалах хэрэгслийг хэрэглэж халдвар хамгааллын дэглэмийг сайтар мөрдөнө.

Зургаа. Хувийн болон албаны тээврийн хэрэгслээр зорчиход тавигдах шаардлага, хүлээх үүрэг

6.1. Хувийн болон албаны тээврийн хэрэгслээр зорчих жолооч, зорчигч нь замд гарах хугацаанаас 48 цагийн дотор тогтсон цэгт КОВИД-19 вирусийн шинжилгээ өгч, өөрийн шинжилгээний хариуг www.119.mn хаягаар орж шалгана.

6.2. Жолооч нь өөрийн болон зорчигчийн аюулгүй байдлыг хангаж, халдвар хамгааллын дэглэмийг мөрдөж, зорчигчдын тоог халдвар хамгааллын дэглэмийн дагуу тогтоосон тооноос хэтрүүлэхгүй.

6.3. Жолооч нь зөвшөөрөгдөөгүй чиглэлд зорчихгүй, зогсохыг зөвшөөрснөөс бусад газарт зогсож, зорчигчийг буулгахгүй.

6.4. Мэргэжлийн хяналтын байгууллагын холбогдох чиглэлийн улсын байцаагч, бусад төрийн байгууллага, эрх бүхий байгууллагын албан тушаалтны тавьсан шаардлагыг биелүүлж, халдваргүйжүүлэлт хийх ажилтны зөвлөмж, зааврыг мөрдөнө.

6.5. Зорчих явцад хэрэглэсэн амны хаалт, бээлий, ахуйн хог хаягдлыг тухайн тээврийн хэрэгслийн жолооч цуглуулж нийслэл, орон нутгийн зөвшөөрөгдсөн хог хаягдлын цэгт битүүмжлэн хаяна. Ил задгай болон бусад цэгт хаяхыг хатуу хориглоно.

6.6. Жолооч нь хогийг цуглуулж хаяхдаа хувийн хамгаалах хэрэгслийг хэрэглэж халдвар хамгааллын дэглэмийг сайтар мөрдөнө.

6.7. Тухайн орон нутагт очмогц 14 хоногийн хугацаанд өөрийгөө гэртээ тусгаарлан, өөрийн болон бусдын эрүүл мэндийг хамгаалж, зохих дэглэмийг мөрдөх бөгөөд халдварын шинж тэмдэг илэрвэл тухайн аймаг, нийслэлийн Онцгой комисс, Эрүүл мэндийн байгууллагад нэн даруй мэдэгдэнэ.

Долоо. Аймаг, нийслэлийн Онцгой комиссын үүрэг

7.1. Аймаг хооронд болон сум хооронд иргэдийг зорчуулах үйл ажиллагааг Аймгийн Онцгой комисс тухай бүр Улсын Онцгой комиссын Шуурхай штабт танилцуулсаны үндсэн дээр энэхүү түр журмын дагуу зохион байгуулна.

7.2. Үндсэн харьяаллын нутаг дэвсгэртээ очих иргэний хүсэлтийг www.119.mn хаягаар хүлээн авч, тухайн орон нутагт зорчин ирж буй иргэдийг хүлээн авах арга хэмжээг холбогдох байгууллагуудтай хамтран зохион байгуулж, зохицуулалтыг хийнэ.

7.3. Жолооч, тээврийн хэрэгслийн цагийн хуваарийг тогтоож, жолооч (ээлжийн жолооч)-д халдвар хамгааллын дэглэм (амны хаалт, бээлий)-ийг чанд сахиулна.

7.4. Тусгай үүргийн хот хоорондын зорчигч тээврийн үйлчилгээг зохицуулах үеийн коронавируст халдвартай холбоотой батлагдсан журам, зөвлөмжийн хэрэгжилтийг хангуулж, хяналт тавина.

7.5. Тээврийн хэрэгслийн цэвэрлэгээ, халдваргүйжүүлэлт, хог хаягдлын устгалын үйл ажиллагааг мэргэжлийн байгууллагаар заавар, журмын дагуу гүйцэтгүүлнэ.

7.6. Дамжин өнгөрч байгаа зорчигч тээврийн хэрэгслийн шатахуун авах, зорчигчийг өөрсдийн бэлтгэсэн хоол, хүнсийг хэрэглэх, бие засах цэгүүдийг тодорхой зааж өгнө.

7.7. Коронавируст халдварын шинж тэмдэг бүхий зорчигч илэрвэл холбогдох хууль тогтоомж, дүрэм, журамд заасан арга хэмжээг даруй авна.

7.8. Тусгаарлах байрыг урьдчилан бэлдэх ба тухайн орон нутагт ирсэн иргэнд халдварын шинж тэмдэг илэрсэн бол шууд тусгаарлана.

7.9. Тухайн орон нутагт ирсэн болон явсан иргэдийн нэгдсэн тоо, бүртгэлийг гаргаж, Улсын Онцгой комиссын Шуурхай штабт болон холбогдох байгууллага, зэргэлдээ орон нутгийн Онцгой комисст тухай бүр мэдээллийг хүргүүлнэ.

7.10. Цаг агаарын хүндэрлээс шалтгаалан тээвэрлэлт үргэлжлэх боломжгүй болсон тохиолдолд тухайн орон нутгийн Онцгой комиссоос зорчигчдыг түр байрлуулах байрны асуудлыг шийдвэрлэж, халдвар хамгааллын дэглэмийг сахиулна.

Найм. Аймаг, нийслэлийн Эрүүл мэндийн байгууллагын үүрэг

8.1. Тухайн иргэний шинжилгээний хариу бусад мэдээллийг www.119.mn хаягаар нэвтэрч шалгана.

8.2. Халдварын шинж тэмдэг бүхий сэжигтэй зорчигч байгаа талаар мэдээлэл ирсэн тохиолдолд тухайн орон нутгийн Онцгой комиссын шуурхай штабаас мэдэгдсэний дагуу тухайн тээврийн хэрэгслийг төв суурин газарт нэвтрэхээс өмнө тандалт, судалгааны багийг явуулж, шуурхай арга хэмжээ авна.

8.3. Тээвэрлэгдэн ирж буй иргэдийн эрүүл мэндийн байдалд хяналт тавьж, шаардлагатай тохиолдолд эрүүл мэндийн тусламжийг үзүүлнэ.

8.4. Зорчигчдоос сэжигтэй тохиолдол илэрсэн үед холбогдох журам, зааврын дагуу түр тусгаарлаж, тухайн орон нутгийн Онцгой комиссын шуурхай штаб, ХӨСҮТ-ийн 80086829, 100 дугаарын утсанд мэдээлж, тушаал, журмын дагуу арга хэмжээг авна.

8.5. Албан хаагчдад халдвараас сэргийлэх хамгаалах хувцас хэрэгслийг өмсөх, тайлах сургалтыг зохион байгуулж, хяналт тавина.

Ес. Халдваргүйжүүлэлт хийх эрх бүхий байгууллагад тавигдах шаардлага, хүлээх үүрэг

9.1. Халдваргүйжүүлэлт хийх байгууллага нь ахуйн шавж, мэрэгч устгах, халдваргүйжүүлэлт хийх мэргэжлийн үйл ажиллагаа явуулах тусгай зөвшөөрөлтэй байна.

9.2. Халдварын сэжигтэй болон батлагдсан тохиолдол илэрсэн үед голомтын эцсийн халдваргүйжүүлэлт, хог хаягдлын устгалыг нийслэлд Зоонозын өвчин судлалын үндэсний төв, аймагт Зоонозын өвчин судлалын төв хариуцан хийнэ.

9.3. Эрүүл мэндийн сайдын 2020 оны А/269 дүгээр тушаалын 8 дугаар хавсралтын дагуу халдваргүйжүүлэлтийн үйл ажиллагааг гүйцэтгэнэ.

9.4. Халдваргүйжүүлэлт хийх ажилтныг халдваргүйжүүлэлтэд зайлшгүй шаардлагатай тоног төхөөрөмж, хувийн хамгаалах хувцас, хэрэгслээр бүрэн хангаж, аюулгүй ажиллагааны зааварчилгааг өгсөн байна.

9.5. Цаг агаарын хүндэрлээс шалтгаалан тээвэрлэлт үргэлжлэх боломжгүй болсон үед зорчигчдыг түр байрлуулсан байранд ариутгал, халдваргүйжүүлэлтийг хийнэ.

Арав. Цагдаагийн байгууллагын үүрэг

10.1. Тухайн иргэний шинжилгээний хариу бусад мэдээллийг www.119.mn хаягаар нэвтэрч шалгана.

10.2. Зорчигч тээврийн хэрэгсэл харьяа нутаг дэвсгэрээр өнгөрөх хугацаанд чиг үүргийн дагуу хяналт тавьж, суурин газрын төвд зогсоохгүйгээр зохицуулна.

10.3. Иргэнийг байнга оршин суудаг нутаг дэвсгэр рүү зорчиж байгаа эсэхэд холбогдох байгууллагатай хамтран хяналт тавина.

10.4. Гэмт хэрэг, зөрчлөөс урьдчилан сэргийлэх, тэмцэх талаарх хууль тогтоомжид заасан чиг үүргээ хэрэгжүүлж ажиллана.

10.5. Цагдаагийн Ерөнхий газар нь зорчигч тээвэрлэсэн талаарх нэгдсэн мэдээг Улсын Онцгой комиссын Шуурхай штабын uok_shtab@nema.gov.mn цахим хаяг, 320103 утсаар тухайн өдрийн 10.00, 18.00 цагт тус тус хүргүүлнэ.

Арваннэг. Мэргэжлийн хяналтын байгууллагын үүрэг

11.1. Тухайн иргэний шинжилгээний хариу бусад мэдээллийг www.119.mn хаягаар нэвтэрч шалгана.

11.2. Зорчигч тээвэрлэлтийн үеийн халдвараас сэргийлэх дэглэмийн хэрэгжилтэд хяналт тавина.

11.3. Тээврийн хэрэгслийн халдваргүйжүүлэх бодисын хадгалалт, хамгаалалт, чанар хэрэглээний аюулгүй байдалд хяналт тавина.

11.4. Тусгай зөвшөөрөл бүхий аж ахуйн нэгж, байгууллагын зорчигч тээврийн хэрэгсэлд хийж буй халдваргүйжүүлэлтын үйл ажиллагаанд хяналт тавина.

11.5. Коронавируст халдвараас сэргийлэх мэргэжлийн зөвлөмж, зөвлөгөөг хот хоорондын зорчигч тээврийн үйлчилгээ эрхэлж буй аж ахуйн нэгж, жолооч, зорчигчид өгнө.

Арванхоёр. Хэрэгжилт, хариуцлага

12.1. Түр журмыг хэрэгжүүлэх үйл ажиллагаа нь Монгол Улсын Үндсэн хууль, холбогдох бусад хууль тогтоомж, эрх бүхий байгууллагаас баталсан тогтоол, шийдвэр, заавар, дүрэм, журам зэрэгт нийцсэн байна.

12.2. Энэхүү түр журам нь бүх нийтийн бэлэн байдлын зэргийг бууруулах, цуцлах хүртэлх хугацаанд хэрэгжинэ.

12.3. Энэхүү түр журмыг дагаж мөрдөөгүй зорчигч, тээвэрлэгчид болон хэрэгжүүлэх үүрэг бүхий этгээдэд холбогдох хууль тогтоомжид заасан хариуцлага хүлээлгэнэ.